



*Senin, 18 September 2023*  
**Ogen : Perbahanen Rasul 16:15b**



*Metemue*



**B**iak metemue em warisen budaya si nai-nai nari enggo isuanken. Kerina budaya bas doni enda ngajarken kerna si e. Cakap metemue bas ogenta enda nuduhkan maka kita kalak Karo terbuka nandangi kalak si deban, meriah ertemue, si baba kalak ku rumahta nandakenca la si akap dalih ieteh kalak uga kita. Adi cakap Indonesiana ramah, pengertin kata enda emekap keleng ate nandangi kalak sideban amin pe la si tandai.

Palasta metemue emkap, perbahan Dibata pe melias man banta. Labo erpilihien ise pe ialo-aloNa jadi anakNa (bnd. Galati 3:26-29). Bangsa Israel pe nai kalak tandang bas negeri Mesir tapi e pe ipekena-kena Tuhan ras ipebelinNa. Adi arah ogenta si idah maka biak metemue eme ulih pertobatan ras pendahin Kesah Si Badia. Perban Lidia, sekalak diberu i Tiatira enggo ngaloken Dibata dingen sada jabu ia enggo iperidiken arah pengajaren rasul Paulus. Maka ersuruh bas pusuhna guna nenahken Rasul Paulus kesilang i rumahna. I bas si enda banci si kataken kalak si enggo ngenanami lias ate Tuhan me si murah akapna jadi kalak si metemue.

Jadi kalak si metemue mbelin kal gunana. Adi kalak rusur reh ku rumahta maka ibabana nge toto mehuli man banta, jenari arah ngerana-ngerana ras teman ntah pe keluarga bas jabunta erbahan maka reh paguhna kiniersadanta. Adi orang tuanta ndube ngataken maka reh teremna temuanta reh simparna rejekinta. Terlebih bas kita kalak Kristen arah biak metemue e banci jadi dalanta guna er-Berita Si Meriah man temanta.